

Lés draules, causéz a l'école !

Dépeu mae d'ine jhénéraciun, lés parlanjhes réjhiounaus s'apernant a l'école per lés faere passae vu que lés familles o fesant pu ghére. Voure aprenre lés troes parlanjhes de Novéle Aguiéne ?

Voure pet o s'aprenre l'oucitan, le basque ou le poetevin-sintunjhaes ? Ve ve rapeléz petétre d'in pepae ou bin d'ine memae causant leu parlanjhe réjhiounau a la mésun, au marchai oube avéc lés voesins. Causéz ve çhou parlanjhe ? Den le tenp o s'apernét surtout en famille. Mé lés deréres étuderies souciolinghistiques o fasant bé vere : avoure, o marche meu en o passant per l'école. Parents de Novéle Aguiéne, ol at mae d'in choes poussible per que vous draules apernant yin daus troes parlanjhes de la Réjhiun. Lés parlanjhes oucitan pi basque pevant s'aprenre den lés écoles, lés coulégjes pi lés liçaes publlics é privais, cunfaessiounaus (catoliques) ou menais per daus associaciuns.

O pet se faere tout cha petit (de quarante cinc minutes a troes eures la semaene) ou bin d'ine façun pu acache. Alore den lés écoles publlicques o serat surtout daus cllasses bilingues (jhusqu'a la moetié dau tenp de cllasse a la petite école). Ol ét den lés écoles associatives qu'o se fét le mae d'incitaciun tout den le parlanjhe réjhiounau. Den çhou cas, o se fét de minme jhusqu'en CE1 (sauve lés autres parlanjhes, bé sur) queme den lés ikastolak dau Paes basque ou bin lés écoles Calandreta per l'oucitan. Lés troes parlanjhes réjhiounaus de Novéle-Aguiéne fasant pertant bé vere troes situaciuns pa parélles. Tandisqu' au Paes basque, ol at in draule su deus qu'ét den ine cllasse bilingue ou bin en cllasse « tout en basque », ol at a paene 1,5 draule dau cent çhi perfitte d'ine incitaciun de minme per l'oucitan. É en poetevin-sintunjhaes, o pet quasiment s'aprenre rin qu'en defore de l'école, l'Éducaciun naciounale requeneussant pa jhusqu'aneut qu'o séjhe apris a l'école, sauve a l'Universitai en opciun ou en diplome universitaere. Entermi çheù que la Réjhiun fét per lés parlanjhes réjhiounaus, a péye ine part de l'Oufice public dau parlanjhe basque é de l'Oufice public dau parlanjhe oucitan, çhi sant daus vraes moeyéns pr métre en pllace la poulitique réjhiounale per lés parlanjhes. Avéc çhés oufices publlics, la Réjhiun éta minme d'oufficialisae deus cunvenciuns per que den chaque académie lés parlanjhes réjhiounaus séjhant apris. De minme, per l'oucitan, qu'ét den lés académies de Poetae é Lémojhe étou, l'académie de Bourdea ét a minme d'ouvri 30 autres écoles publlicques bilingues de 2017 a 2022 (yine a cha département a cha z-annaie). Le poetevin-sintunjhaes pet aguerouae li-tou lés écolisés dés la matérnale : a la cuncourerie Émajhes é tésces en poetevin-sintunjhaes, l'école matérnale Alphonse-Daudet seyit primaie çhête annaie, a Poetae, den le quartié populaere daus Couroneries.